

A pezzra bèlt

'Z iz pròpio bar: in vèrt vo dar fraihait d'arkhénntmen lai balmase hatt vorlòrt. Lai vor an mànat, segante in televisióng di tschinésan alle inngespèrrt in soine haüsarn, di lern beng vo Wuhan, Shanghai un Pekino, di spèrrn pinn pintarn boda hãm gemèzzt 'z viavar in laüt, habar geschüttlt in khopf un pensàrt: betta schaüla lânt, betta pòasa diktatür, boda spèrrt inn soine laüt asó, sovl bisa beratn alle delinquèntn. Nia, nia hettaparaz intruamp zo maganaz vennen, biane bochan spetar, in da geläichege situatzióng. Zo khòda daz bar, però, mochan stian dahümman, in tang azpi dise, iz no daz peste bodaz mage vürkhemmen. 'Z soinda laüt, azpi di doktör, di infermiarn, di vorkhoavar von supermerké, boda stianatn gearn dahümman, azza magatn, anvétze soinsa sèmm atti arbat, ristschàrante soi lem vor alle üs. Ber vòrtetze zo darkränkha, ber zo vorliara di arbat, ber petet vor a liabez mensch boda khempft vor soi lem in an pett von ospedal. Dena soinda di sèlln boda schikhan ummar lustege foto un filmn pinn telefoni - i boaz nèt erändre, ma i hännara sa gevänk a gântza khutta.



Lachan übar an söttan schaülan beata boda sa hatt gemacht sovl toatn, geatz no? Vor mi, in söttane zaitn, allz bazta helft zo mèkka di vort un zo giana vür, geat. Magäre, in a par tang, bartzmar trèffan miar o, ma antànto, per piatzer, lazztme lachan, ke 'z iz ummaz von bintsche sachandar boda nonet soin vietàrt. Àndre no süachan z'sega disa situatzióng vo soinar guatn sait: est habar mearar zait vor üs sèlbart un vor üsarne liam. Zait zo khocha eppaz guatz, zo lesa an libar, z'spila pinn khindarn, zo lirna a zung, herzorichta in sèll gazèr bodase

hatt gehäüvart atti tetsch odar in rovòlt - odar in üsarn khöpf. Zait drauzopensàra att alle di guatn sachandar bobar hãm àna zo rendranaz kunt. Dar air in di statt iz nia gest sovl sauber azpi est, boda di laüt lazzan in auto in garage un vil fabrike soin gespèrrt. A virus, a dinkh asó khlumma boma njänka sek, hattz dartànt zo tüana daz sèll boda a djar vo manifestatzióngen - Fridays for Future, gedenkhtaraz? - iz nèt gelänk: zbingen di laüt z'stiana mearar dahümman, zo nütza mindar in auto un zo khoava mindar geplèttra iargeprenk vo dar Tschina odar vo kisà bo. Vor hundartar djar habar boschizt, bosüdt un bodrèkht di earde, sidar djardar di studjös gedenkhanaz ke dar klima iz nà zo bèksla, ma fin est izta khent getànt bintsche nicht. Est, a tiabas a bòtta, üsar armar, plabar planét mage ziang in atn. Baz mai barta tüan di Greta Thunberg, est boda disar khlummadar, frèchar virus hattar gestolt di arbat? Est triffzt üsàndarn lirnen eppaz vo disar krisi. Asó, balse bart soin verte, furse üsar lem bart soin a pizzle pezzar un di earde a pezzrar platz zo lebada.

Paolo

Istituto Cimbro
Kulturinstitut Lusérn
Tel. 0464-78.96.45
info@kil.lusern.it
www.istitutocimbro.it



Stechar baz an earstn

“Bar bartnsan auzkhemmen stechar baz an earstn”
Alle bizzan bazta iz nà vürzokhemma in dise zaitn, sichar boaztar o ke 'z iz eppaz schaüla un ke 'z bart no vorttrang vil laüt.
Sa khön ke 'z barta vort gian no vil zait vorse bartn bidar leng apóst di sachandar un az allz khear bidrümme azpe an earstn.
Est mochpar lai paitn, stian da huam nèt lai vor üs, ma vor üsarne laüt o, vor üsarne non un eltar.
Ànka azta allz mage parirn sbartz un allz parirt gian letz, mochpar hërta süachan eppaz schümmaz in allz da sèll boda auzvallt.
In dise tang habar mearar zait zo pensàra, zo stiana alümma, zo rastanaz auz.
Ma 'z soinda vil àndre sachandar boma mage tüan da huam: stian pitt üsarn laüt, üsarne prüadar un sbestarn, khochan eppaz pittnàndar, lesan, lüsnen musik, àschaung di televisióng, spiln in kartn un vil àndarz.
Sichar, alln menglen di tschelln, stian auz in air, gian inn pan üsarn schümman beldar un vennese pittnàndar in platz, ma bar bartn bidar tüan allz ditza un bartnz tüan gebante vil mearar vèrt in khlumman sachandar.
In dise tang hãmssa ummargeschikt a poesia boda hatt geschribet a bichtegez baibe, Kathleen O'Meara in 1800, in di djardar boda iz gest di peste.
I gloabe ke dise börtar soin pròpio djüst vor disa zait bobar soin nà zo leba un vor ditza hãnesaz geböllt machan lesan.

Guarire

“E la gente rimase a casa e lesse libri e ascoltò e si riposò e fece esercizi e fece arte e giocò e imparò nuovi modi di essere e si fermò e ascoltò più in profondità qualcuno meditava qualcuno pregava qualcuno ballava qualcuno incontrò la propria ombra e la gente cominciò a pensare in modo differente e la gente guarì.”

E nell'assenza di gente che viveva in modi ignoranti pericolosi senza senso e senza cuore, anche la terra cominciò a guarire e quando il pericolo finì e la gente si ritrovò si addolorarono per i morti e fecero nuove scelte e sognarono nuove visioni e crearono nuovi modi di vivere e guarirono completamente la terra così come erano guariti loro.”



Bar mochan vorstian ke di bèlt geat vürnsen zo leba, ànka azta allz parirt vest.
Di natür izzaz nà innz'spèrra, furse zo khòdanaz ke bar hãm eppaz gevelt. Si izzaz nà zo khòda ke si geat vürnsen ena üs o un ke furse hattze mængl zo stiana ena.
Si izzaz nà zo khòda zo gedenkhanaz balbar bartn khearn bidrümme ke bar soin nèt padrù ma lai gèste.
Est mochpar tüan allz da sèll bosaz khön un bartnsan auzkhemmen stechar baz an earstn.

Anna N. N.

Dar Inno vo Mameli

Azpe alle bizzan, in dise lestn bochan vil laüt in gântz Beleschlânt mochan stian inngespèrrt in soine haüsarn peng dar emerdjèntza von Covid19, an schaülan beata boda, in di lestn zaitn, iz gerift un iz no nà zo riva in vil lentar in da gântz bèlt.
Magante nèt gian auz von haus, vil belese, in dise trauregen tang, hãm asó àgeheft zo giana auz atti pontesöln zo singa alle pittnàndar lustege kantzüla zoa zo ziaganen au a ripp un zo helva in àndarn o zo halta hert. In di lern beng vo vil stattn hattma gemak höarn di stimmen von belesan atti pontesöln boda hãm gesunk in Inno Natziònal o.
Atz 20 von lèntzmàn dar Inno iz khent gelazt höarn, pittnàndar pitt àndre drai gekhennate belese kantzü, in alle di radio von Beleschlânt boda, vor da earst bòtta in di stòrdja vodar üsar Natzióng, hãm auzgemacht zo lazza höarn in geläich moment daz geläich sachan bohräll.
In dise bochan di laüt soine asó gehöart a migele mearar gepuntet pitt soinar Natzióng un hãm gesunk mearare vert soin Inno, eppaz boda di sölito khint vür lai balda khemmen gemacht di partie vo fuzboll odar àndre spiln un spòrt kontro àndre lentar. Ma sebar alóra bia un bo 'z

izta gebortet disar Inno.
Dar Inno von Beleschlânt, boda alle khennen azpe *Inno vo Mameli* odar *Prüadar von Beleschlânt*, iz a gesinga rinaschimentale geschribet 'z djar 1847 von Goffredo Mameli, a belesar schraibar un patriòta gebortet a Genova. Di musik von Inno, anvétze, iz khent zornirt un boróatet von Michele Novaro, boda iz o gest a belesar patriòta gebortet a Genova. Dar Mameli hatt geschribet in tekst von Inno baldar iz gest pròpio djung: dar hatt gehatt, defàtti, lai 20 djar un, z'schraibanen, izzarse ispiràrt atti *Marsigliese* vodar Francia. Quàse zboa djar spetar dar djung schraibar iz laider gestorbet khempfante zo untarstütza di Repùbblika Romana.
Dar *Inno vo Mameli* iz khent vil gekhennt un gesunk in di djardar von Risorgimento un in di djardar darnà o. Dòpo dar Unità von Beleschlânt però, azpe Inno uffitziàl, izta khent zornirt di “Marcia Reale” von Haus von Savoia, di monarchia boda hatt governàrt di Natzióng fin dòpo in Zboate Bèltkriage, balda, atz 2 von prachant von djar 1946, 'z Beleschlânt iz khent a Repùbblika. Von sèll djar dar Inno iz khent z'soina dar Inno Natziònal provvisòrio, un iz gestànt



fin haüt zo tage.
Von sèll bait 1946 iztasan “gevallt snea atti pèrng” vormaz hatt dartànt zo macha khemmen in *Inno vo Mameli* Inno uffitziàl von Beleschlânt: pittar ledje n. 181 atz 4 von kristmàn dar djar 2017, lai vor drai djar, dar Inno iz, an lestn, khent uffitzièll.
Haüt singbaren zo lazzanaz höarn starch in disa traurega situatzióng, ma benn allz dizta bart soin vorgànt, mochparaz gedenkhan z'soina stoltz alle di vert bobaren singen.

E.v.K.

Di schualn in disa sber zait



khòda zboa sachandar sber vor üs.
Alle di schualn soin gespèrrt vodar lest boch von hornung, ma di schüalar mang tüan allz azpe hërta umbrómme di maistre gian zo lesa un zo lirna allz in internet un mang auvorsan in schüalar zoa zo haba di vote.
In gântz Beleschlânt soinsa nà zo reda zo traga vür allz ummaz di schualn ditza djar, ànka azta nèt soin khent gemacht genümma tang schual. Umbrómme vorliarn a djar iz nèt schümme, ànka azta vo djung vorstèatma nèt gerècht alle dise sachandar.
Anvétze vor di studèntn boda gian in di università iz àndarz, umbrómme von lèntz fin in höbiat mangsa lai lüsnen di letzióngen, un lai auz pan summar mangsa machan di esàmi. Vor di sèllnen alóra iz a pizzle destraz, umbrómme est in a par mànat furse bartz gian pezzar un asó mangsa khearn bidrümme ka schual ena zo vorliara zait.
I gloabe ke ma mage khön ke vor alln in sèlln boda machan di università iz dèstar umbrómme di letzióngen

khemmen gemacht in internet, un asó auz pa tage mangsa gian zo arbata odar tüan eppaz àndarst, un abas dòpo gezzt di tschoi mangsa àschaung di letzióngen.
'Z izta zo khòda o ke dar mànat von lèntz iz a mànat boda in di università khemmenda gemacht di lauree von sèllnen boda hãm gerift zo studjara dòpo drai odar vüf djar.
Un bia hãmza getànt haür zo macha dise dökhtur? 'Z iz dèstar, sa hãmz getànt hërta pitt internet, un asó soinda khent gemacht di naüng dökhtur.
Tüan asó iz gest daz peste sachan - asó azpedez sige i -, umbrómme di studèntn hãm nèt gemocht paitn fin auz pan summar zo vanga in pefèl, ànka azta asó izta nèt gest dar sèll schümme air zo vaira azpe hërta.
Bar mochan gloam ke in biane zait alle di djungen mochattn khearn bidrümme zo giana ka schual, zo lüsna di maistre un zo macha ettlane tritt alle pittnàndar.

Michele Neff



Dar Kulturinstitut Lusérn, zoa auzohalta da Zimbarzung, hatt augilekk haür o in prais “Tönle Bintarn”. Allz mocht khemmen geschikht vorda auz iz dar **vraita 8 von madjo 2020**.
L'Istituto Cimbro di Luserna, per sostenere, promuovere e sviluppare la scrittura della lingua cimbra, bandisce la nona edizione del concorso letterario “Tönle Bintarn”.
Gli elaborati inediti in lingua cimbra dovranno pervenire **entro venerdì 8 maggio 2020**.
Regolamento completo sul sito www.istitutocimbro.it

